

LEBENS LAUF

Florian Eisenmann

An Florian Eisenmann, insan Opa, hods am 5. Mai 1934 ogem, wo er beim Vorderwald-Hof ois neints vo 10 Kinder auf de Wöd kemma is und vo doscht weck in Ellmau glebt hot.

Obwoi er in der Kriegszeit aufgwochn is, hod er sei Kindheit als sche empfundn, denn Florä hot scho oiwei vü fe de Natur und de Viecha iwakob. Mit 13 Johr is ea ois Hiatabua auf da Grosboidoim und spada auf da Regoim beim Orwettm gwesn.

In seiner Jugend wor er a scho a begeisterter Jaga, a wenn er des mit sein Ötta nu gor nid toa hätt deafn!

Er hot oiwei gsog as Gams- und Rechfleisch is a guade Abwechslung zua Müchsuppn gwesn.

Da Opa hot nid kod vü Leidenschaft fes Jagan kob sondern sei zwoate Hoamat wor vo unfong u da Koasa. Insa Koasa mit seine Spitzen und Steigen wor sei Wohlfühlort fia`s gonze Lem. Da Flori hot a vü gorwett. Fo sein 20. Lebensjohr bis zu seiner Pensionierung isa ois LKW Fohra unterwegs gwesn. Er wor oiwei auf Kurzstrecken aufn Weg weil eam s`Hoamkemma ad Öma (Ellmau) gonz wichtig wor.

A wenna sich gean vü u`gschaugg hod und erlem hod woin, wor eam a Dahoam oiwei wichtig, desweng hod ea zomm mit sein Vota an Auwoid a Heisl baut. In dea Zeit hod ea a sei geliebte Ehefrau Maria, insa Oma, kena gleand und de Zwoa send noch der Heirat im November 1965 dort eizochn! As Familienglück wor perfekt ois de Oma eana erste Tochter Maria im drauffolgenden Johr geboren hat und Ingrid 3 Johr spada auf de Wöd kemma is. An Opa sei gonzer Stoiz wor de Familie und des hod ma a gmerkt wenn man kennt hot.

Ez mecht ma enk a kloane Geschichte vazön... Wia ma scho keascht homb, hot eam as ummanond kemma guad gfoin und des woita a seine Diandla weida gebm.

Iatz isa mit seine Zwoa in jungen Johnn mitn Fliaga zu seina Schwesta noch Düsseldorf gflong. Hoamkemma sends iwan Rhein mitn Schiffe und noand weida vo München nach Kufstein mitn Zug, wo noad am Bahnhof de Oma se wieda koit hot. Auf de Frog hi, wiara des ois organisiert hod, hoda nia a Antwort gwisst... owa de Hauptsoch wor, hoam kemma sends a wieda guad!

An August hoda si oiwei Urlaub gnumma, fe de Rechbrunft, zum klettern und das a fe de Diandln in de Ferien do sei ku...ea is mid eana midn Radl, da Kniabundhos und Wojane Strimpf as Schwimmbod gfohn, hod si auf de Bretter unter de Bam kuckt und hod si gfreid dass de zwoa schwimma kinand und a Gaudi homb. A Eisei hods danoch a oiwei ogebm!

So unternehmensfreudig wia ea a wor, über sei Familie hoda nix kemma lossn...de wor oiwei an erster Stö. Spada wo Maria und Ingrid a eigene Familie kob homb, wor da Opa da easchte wos beim Haus baun, heing, Zein, gen Oim fohn und Hoiz richtn köffn hot und war sogar beleidigt gwesn, wenn ea amoi nid gfrogg worn war.

Nehm seina Familie hot da Opa nu zwoa große Leidenschaftn kob, fe dia er a jede freie Minute genutzt hot. As Jagan geh und as Dachsbracken züchten. Mit vü Liebe, Zeit und Engagement hod er sich seine Hund gewidmet und hod bundesweit tolle Erfolge erzielt. De Jagd und Dachsbrackenzucht worn fe eam nid kod a Hobby, des won Teile vo sein Lem, de eam vü Freid und Erfüllung gschenkt homb.

So wia ma keascht homb wor Opa sei Lem ois ondare ois longweilig, er hätt a oafoch mid 60 in Pension geh kina, owa des wor nied des seinige. Ea is nochand nu zehn Johr im Winter zum Lift zun Aushöffn gonga und im Summa hot ea sich a de Bienen gewidmet, damit er seine Liebsten mitn besten Honig versorgn hot kina.

As Leben vo Opa und Oma hod sich nochand nu amoi grundlegend geändert. De Oma hod de Diagnose Demenz griag. Sie hod immer mehr Unterstützung braucht und da Opa hod sie liebevoll so lange wias irgendwie möglich wor dahoam in Auwald pfleg! Ois gor nimma gonga is, homb ea und seine 2 Diandln beschlossen, Oma schweren Herzens ins Pflegeheim in Scheffau zu übersiedeln!

Es wor fe de gonze Familie a zacher Schritt! Da Opa is nochand mit seim Auto, oiwei nu söwa, sche stad hoid, de letztn elf Johr fost täglich ins Pflegeheim zua Oma gfohrn. Ea is mit ia spazieren gonga und hod sich oiwei liebevoll mit viel Geduld um sie kümmert.

Zum Glück wor er imma in ausgezeichneter Gesundheit und hot sei Leben bis zuletzt selbstbestimmt genießen dürfen.

Egal ob er mitn Auto aufn weg wor oder Zeit mit Enkel und Urenkel verbracht hat, da Flori hot seine letzten Lebensjahre nu in vollen Zügen geliebt.

Zu sein 90iger homb eam die Freunde vo der Naschberger Kaschtlerrunde no an Hubschrauberrundflug über sein Hausberg, an Koasa sowia as gonze Sölllandl geschenkt. So hot ea sei geliebts Dahoam vo om und vo oi Seitn amoi sechn deafn.

DONK SCHE song mia fe de schene gemeinsame Zeit, fe ois wos ma vo dia leana homb deafn und de unvergesslichn Momente, de ma mit dia, verbinden homb deafn. Mia wean di nia vergessen und di oiwei im Herzen mit uns mitlebn lossn!

Wiazt a zletzt nu gsogg host: „Riascht sich a da Öma (Ellmau) eh oiwei eppas?“

Noch so an scheen & ereignisreichen Lebm loss´n mia di iatz geh und bittn di nu,
SCHAUG AUF INS...

...VERGELT´S GOTT FE OIS ...Ruhe in Friedn!